

Ya Hulat kanlan Hebreo

Paunan habi

A na inungkat di ha Hulat kanlan Hebreo ya ampaniwala kan Panginoon Jesus no hinoy nag hulat. Noa, muwang tamo ya nanulat ay mihay ampaniwala kan Panginoon Jesus, ya hi Panginoon Jesus ya habaytoy impangako, ya Mesias, ya Cristo, ya Mámiligtas, ya Anak ni Apo Namalyari, ya mamaala hén ayn angga, haka mam-in biyay ya ayn angga kanlan ampaniwala kana.

Di ha hulat ay ampakhawên nan nanulat ya nakêm lan anhulatan na hén ihundo lay paniwala la, gawan main a ampaniwala ya anhumalang-hang kanla hén main hadyay pamairap kanla. Hilay habaytoy ampamairap kanla ay ampaniwala ya a ya pon nilumatêng ya Mesias, ya Cristo, ya Mámiligtas, kabay kaatag ya an-êngganan la, alwan hi Panginoon Jesus.

An-ipaihip na kanla ya hi Panginoon Jesus ay Anak ni Apo Namalyari, haka hiya ay ayn kapatag ha hinon anghel, o hinon mámpamwang hén an-ipaihip kanla ni Apo Namalyari. Hi Panginoon Jesus ay inhagili ha pinakapoon pari ta hiyay nag-in mamilatan hén balang miha kan Apo Namalyari hén in-átang nay sarili na ha pamayad hén kasalanan tamo. Hiyay biniyay oman ni Apo Namalyari, haka gawan kana ay main biyay ya ayn angga ha langit ya balang ampaniwala kana.

Kabooan hén pinakalaman

Hi Apo Jesu-Cristo ay Anak ni Apo Namalyari
1:1-3
 Hi Apo Jesu-Cristo ay matag-ay ha kaganawan
anghel 1:4-2:18
 Hi Apo Jesu-Cristo ay matag-ay kan apo Moises
haka kan Josue 3:1-4:13
 Hi Apo Jesu-Cristo ay matag-ay kanlan
pinakapoon pari 4:14-7:28
 Hi Apo Jesu-Cristo ay mamilatan hēn bayoy
kahundoan ya mangēd ha manan kahundoan
8:1-9:28
 Ya pamiatang ni Apo Jesu-Cristo hēn sarili na, ay
mangēd ha kaganawan átang 10:1-39
 Ya paniwala ya ayn kapantag, payo, haka
panaad 11:1-12:29
 Ya pamanhumonol ya ampamahigla kan Apo
Namalyari 13:1-19
 Inhalangin hilay hinulatan 13:20-21
 Tawlin habi 13:22-25

*Impamwang ni Apo Namalyari no hino ya,
gawan kan Apo Jesu-Cristo, ya Anak na*

¹ Hēn haton lagi, ay panay nan an-ipamwang
ni Apo Namalyari ya kalabayan na kanlan nin-
uno tamo ha mal-at ya paraan, gawan kanlan
mámpamwang na.

² Noa, améhēn, ay impamwang nay kalabayan
na kantamo gawan ha Anak na. Gawan êt ha Anak
na ay dinyag nay kaganawan. Haka ya Anak na ay
pinili na hēn dyanan hēn habayto ngan.

³ Atsi êt kanan Anak ya kapahilêw ya kaham-
patan haka ya panga-Diyos ni Apo Namalyari.
Angkahêlêk ha Anak no ay-êmén ya ugali ni

Apo Namalyari. Ya Anak ay ampamaala ha kaganawan ya atsi ha ayri man ya legal ha makapangyarihan ya utoh na. Ya Anak ay nanlinis kantamo ha kasalanan tamo, bayo nag-orong yay na ha langit ha dapit panabtab ni Apo Namalyari hēn mamaala hēn kalamo na.

Matag-ay ya tungkulan ni Apo Jesu-Cristo, ya Anak ni Apo Namalyari kanlan tungkulan lan anghel

⁴ Ya Anak ay dinyanan hēn tungkulan ya matag-ay ha tungkulan lan anghel. Muwang tamoy habayto gawan “Anak” ya pamaēg kana ni Apo Namalyari, haka “anghel” bat ya pamaēg na kanlan anghel.

⁵ Minghan man, ay a na hinabi ni Apo Namalyari ha hinon anghel ya hinabi na ha Anak na, ya wana,

“Hika ya Anak ko,
haka amēhēn impamwang ko ya hiko ya Tatang
mo!”*

A na etaman hinabi hēn tungkol ha hinon anghel,
“Hikoy mag-in Tatang na,
haka hiyay mag-in Anak ko.”†

⁶ Haka hēn hato, hēn marani na yay nan iutoh ya kamiha-mihaan nan Anak ha luta, ay êmēn di ya hinabi na hēn tungkol kanan Anak,

“Dapat yan simbaēn hēn kaganawan anghel ko.”

⁷ Tungkol etaman kanlan anghel, êmēn di ya hinabi na,

“Hilay anghel etaman ay pan-iutoh kon bēngat. Ha pamaghuyo la kangko ay malyari ko hilan

* **1:5** Awit 2:7, Dyag 13:33. † **1:5** 2 Samuel 7:14, 1 Cronica 17:13.

iutoh hēn nanad ha pan-iutoh koy angin o apoy.”

⁸ Noa, matag-ay ya tungkulan nan Anak, ta ya hinabi ni Apo Namalyari kanan Anak na, ay êmêñ di,

“O Diyos, ya pamamaala mo ay ayn anggaan, haka ampamaala ka, hēn main katoynungan.

⁹ An-ikahigla mo ya dyag ya main katoynungan, noa, angkahêmékan moy karawakan, kabay hiko, ya Diyos mo, ay namili kamo, hēn dinyanan hēn kahiglaan, ya igit pon ha kahiglaan hēn hinon kalamo mo.”‡

¹⁰ Haka wana êt ni Apo Namalyari hēn tungkol ha Anak na,

“Hēn una, ay hika Panginoon ya nanyag hēn luta haka langit.

¹¹ Lumatêng ya allo, ay maanggaan ya habayto ngan,

noa, hika ay ayn anggaan.

Ya habayto ngan ay mag-in ayn pukat hēn nanad ha gulot ya takop.

¹² Itapon mo ya habayto ngan ta hagilyan mina, hēn nanad ha gulot ya takop.

Noa, hika ay a ampangoman,

haka a antumoa o matsi man.”§

¹³ Minghan man, ay a na hinabi ni Apo Namalyari ha hinon anghel ya hinabi na ha Anak na, ya wana,

“Mikno ka ha dapit panabtab ko hēn mamaala hēn kalamo ko,

‡ **1:9** Awit 45:6-7. § **1:12** Awit 102:25-27.

angga ha hambutêñ ko hilay kapatsi mo, ta idin ko hila ha aypan kapangyarihan mo.”*

14 No êmbayro ay hino awud ya tungkulon lan anghel? Hila ay espiritu, ya a tamo mahêlêk, ya ampaghuyo kan Apo Namalyari, ta êmêñ mahawpan kitamo ya miligtas.

2

Hi Apo Jesu-Cristo ya pinangubatan hên ayn kapan>tag ya kaligtasan tamo

1 Gawan makapangyarihan ya Anak ni Apo Namalyari ha kaganawan anghel, ay dapat pakapaniwal-an tamo ya kaptêgan ya intoro kantamo, ta êmêñ a kitamo mipakarayo kanan habaytoy kaptêgan.

2 Pêtêg ya Kautuhan ni Apo Namalyari kanlan ninuno tamo, anghel na man ya namipamwang hên habayto, ta hilay a hinumonol haka nanalanghang kanlan habayto, ay nakatanggap hên parusa ya hêpat kanla.

3 No êmbayro ya nalyari kanla, ay kantamo pon kaya no araêñ tamoy kaligtasan ya ayn kapan>tag, ya unan impamwang ni Panginoon Jesus, ya pinaptêgan kantamo hên hilay nakagilam ha impamwang na.

4 Haka habaytoy pinaptêgan êt hên kapangyarihan ni Apo Namalyari hên hino-hino kay na hên ya kapapaêpapah. Pinaptêgan na êt hên indin nan Espritu na hên galing ha balang labay nan dyanan.

Hi Apo Jesu-Cristo ay nag-in tawo ta êmêñ na kitamo iligtas

* **1:13** Awit 110:1.

5 A na indin ni Apo Namalyari kanlan anghel ya pamaala ha bayon luta ya an-ungkatêñ ko.

6 Ha Kahulatan ya impahulat ni Apo Namalyari, ay êmên di ya nakahulat,

“Apo Namalyari, hino awud hilay tawo ta panay mo hilan ampansinêñ haka anhayhayêñ?

7 In-aypa moy tungkulan la pon, hêñ maaypan pêrad ha tungkulan lan anghel.

Noa, tinalagá mo ya lumatêng ya allo ay ipadayêw haka ipagalang mo hila,

8 ta iubuh mon idin ha aypa hêñ kapangyarihan la ya kaganawan dinyag.”*

Ya labay nan habiêñ hêñ habaytoy nakahulat, ay uston iubuh nan idin ni Apo Namalyari ya habayto ha aypa hêñ kapangyarihan lan tawo, ay taganán iubuh na kanla ya kaganawan dinyag. Pêtêg ya a tamo pon angkahêlêk ya habayto amêhêñ.

9 Noa, muwang tamo ya natupad ya habayto gawan kan Apo Jesus, ya in-aypa pon ya tungkulan hêñ maaypan pêrad ha tungkulan lan anghel hêñ hiyay nag-in tawo, haka hiyay natsi ta êmên mapatawad ya kasalanan tamo, gawan ha ayn kapantag ya ingangalo ni Apo Namalyari. Haka amêhêñ hiyay dinyag hêñ ampamaala hêñ main kapangyarihan haka karangalan gawan habaytoy kamatsan na.

10 Hêpat bat kan Apo Namalyari, ya nanyag hêñ langit haka luta, haka ampanayhay hêñ habayto, hêñ ipadann nay Anak na, hi Apo Jesus, ha kamatsan ta êmên hiyay mag-in Mámiligtas ya taganán

* **2:8** Awit 8:4-6.

ganap. Kabay mal-at ya magêtan na ha langit, ya ampaniwala kana.

¹¹ Gawan hi Apo Jesus ya ampangalih hên kasalanan lan ampaniwala kana haka hilay analihan kasalanan, ay mimihay Tatang, ay a na hilay na an-ikarêng-êy hên baégén hilan patêl na.

¹² Anhabiên na kan Apo Namalyari, “Ipamwang kata ha kaganawan patêl ko, ha pagtsiponan la hên magsimba kamo, ay puriên kata!”[†]

¹³ Wana êt,
“Hikoy magtsiwala kan Apo Namalyari.”
Haka wana êt tungkol kanlan nanad patêl na,
“Atsi ko di hên kalamo hilay anak ni Apo Namalyari ya impatsiwala na kangko.”[‡]

¹⁴ Gawan hilay habaytoy anak ya impatsiwala kana ay tawo, ya main lawini ya panluta ya matsi, ay hiyay nag-in tawo etaman, ta gawan ha kamatsan na, ay mahambut na hi Satanas ya ampanalan hên kapangyarihan hên kamatsan, hên alihêñ ya kapangyarihan na.

¹⁵ Ha êmbayro ay nibuhan kitamo ya nanad nag-in ipoh ha kamatsan paubat hên in-anak kitamo, gawan limo tamon matsi.

¹⁶ Malinaw ya alwan anghel ya anhawpan na, ta hikitamoy intad kaapo-apoan ni apo Abraham ya anhawpan na.

¹⁷ Kabay kailangan hiyay mag-in tawo nanad kantamo, ya patêl na, ta êmêñ ya mag-in pinakapoon pari tamo, ya maingaloën. Haka ta êmêñ ya mag-in mapaypaniwal-an ya mámilatan

[†] 2:12 Awit 22:22. [‡] 2:13 Isaias 8:17-18.

tamo kan Apo Namalyari. Ta ha pangamatsi na, ay hiyay pinarusaan ha ikapagpapatawad hēn kasalanān tamo.

¹⁸ Haka gawan hiyay nagtēhē hēn hadyay pamairap ha pamanukso, ay mahawpan na kitamo ha kaganawan tukso ya lumatēng kantamo.

3

Matag-ay ya tungkulan ni Apo Jesu-Cristo, ya Anak, kanan tungkulan ni apo Moises, ya tagahuyo

¹ Patēl ha Panginoon, ya kapareho kon pinili hēn mag-in maának ni Apo Namalyari haka hēn makilamo kana ha langit, pakaihipēn tamo ya in-utoh hi Apo Jesus, ya an-ipamwang tamo, hēn mag-in pinakapoon pari ya namiúmang kantamo kan Apo Namalyari.

² Mahipēg yan nanyag hēn tinalagá ni Apo Namalyari, ya namili kana. Mapaypaniwal-an ya hēn nanad kan apo Moises ya mapaypaniwal-an hēn namaala ya kanlan ninuno tamon Israelita, ya pamilya ni Apo Namalyari.

³ Noa, matag-ay ya tungkulan ni Apo Jesus, kanan tungkulan ni apo Moises, hēn nanad ha dapat igit dayēwēn ya nanyag bali kanan bali ya dinyag na.

⁴ Gawan kaganawan bali ay main nanyag, haka muwang tamo ya hi Apo Namalyari ya nanyag hēn balang hino.

⁵ Hi apo Moises, ay mapaypaniwal-an ha pamayhay na ha pamilya ni Apo Namalyari, hiyay tagahuyo ni Apo Namalyari, noa, ya dinyag na ay alimbawan bat ha ipamwang ni Apo Namalyari lumatēng ya allo.

6 Noa, hi Apo Jesu-Cristo etaman, ay Anak ni Apo Namalyari, ya mapaypaniwal-an ha pamamaala ha pamilya ni Apo Namalyari. Haka hikitamoy kalamo ha maának na no nananiêh ya paniwala tamo kana, haka no a tamo ikarêng-êy ya habaytoy paniwala.

Main pagpainawaan ha lokop ni Apo Namalyari

7 Kabay kailangan tamon pansiñen ya hinabi ni Apo Namalyari ya impahulat nan Espiritu na, ya wanana hulat,

“No nagilam yo amêhêñ ya hinabi ko,

8 ay a yoy na pakdêyêñ ya ulo yo, hêñ nanad kanlan ninuno yo,

ya nanalanghang hêñ nanubuk kangko hêñ atsi hila ha legal ya kabalah-balahan.

9 Panay la kon ansubukan hêñ hilay ninuno yo, angkahêlêk la man ya kapapaêpapah ya dinyag ko ha ikakangêd la ha apatapo ya taon.

10 Kabay nagkamain akon huluk kanlan habayto, haka wangko ha sarili ko, ‘panay hilan ampag-dayo kangko,

haka a la anhonolêñ ya hinon in-utoh ko kanla.’

11 Kabay ha hadyay huluk ko kanla, ay inhumpa ko,

ya taganán a hilay na makahowêñ ha pagpainawaan ya in-il-an ko.”*

12 Hikaw ya patêl ko ha Panginoon, illagan yoy nakêm yo ha karawakan, ta êmêñ a kaw midayo ha paniwala yo kan Apo Namalyari, ya angkabiyay hêñ magpa ayn angga.

* **3:11** Awit 95:7-11.

13 Ya dapat yon daygén, ay mipagpakhawan kaw hén paniwala ha miha ta miha hén allo-allo kaban main pon panaon, ta êmén ayn miha man kamoyu ya manalanghang kan Apo Namalyari gawan ha natukso yan nanyag kasalanan.

14 Dapat yon daygén ya habayto, gawan hikitamo ay main pamakilamo kan Apo Jesu-Cristo, no nakataniêh ya paniwala tamo kana hén angga ha anggaan biyay tamo.

15 Omanên tamon ihipén ya impahulat ni Apo Namalyari, ya wanana Kahulatan,

“No nagilam yo amêhén ya hinabi ni Apo Namalyari,

ay a yoy na pakdêyén ya ulo yo, hén nanad kanlan ninuno yo,

ya nanalanghang kan Apo Namalyari hén atsi hila ha legal ya kabalah-balahan.”

16 Hino awud hilay habaytoy nakagilam habi ni Apo Namalyari, noa, nanalanghang kana? Hila ay ayn kaatag no alwan hilay in-awah ni apo Moises ha bansan Egipto!

17 Haka hino hilay habaytoy namahuluk etaman kan Apo Namalyari hén apatapo ya taon? Hila ay ayn kaatag no alwan hila êt ya nanyag kasalanan, haka natsi ha kabalah-balahan!

18 Haka hino hilay habaytoy inhumpa ni Apo Namalyari ya a hila makahowén ha pagpainawaan ya in-il-an na? Hila ay ayn kaatag no alwan hila êt ya a hinumonol kana!

19 Kabay malinaw ya a hila nakahowén ha pagpainawaan ya in-il-an na, gawan ayn hilan paniwala kana.

4

Ya pagpainawaan ya impangako ni Apo Namalyari ha lokop na

¹ Amêhén, habaytoy pagpainawaan etaman ha lokop ni Apo Namalyari, ya impangako na, ay makahowén kitamo pon bayro. Kabay kaillag kitamo ta êmén ya balang miha kamoyu ay makalaténg bayro ha pagpainawaan.

² Ta hikitamo man, ay nakagilam hén manggéd ya habi ya tungkol ha pagpainawaan nanad kanlan ninuno. Noa, a la pinakinabangnan ya nagilam la, gawan a la pinaniwal-an.

³ Ta hikitamo ya naniwala kan Apo Namalyari, ay makahowén bayro ha pagpainawaan na. Muwang tamoy habayto, ta makwa tamo ha hinabi na di, ya tungkol kanlan a naniwala, ya wana, “Ha hadyay huluk ko kanla, ay naghumpa ko, ya taganán a hilay na makahowén ha pagpainawaan ya in-il-an ko.”

Hinabi nay habayto, agyan nakal-an ya pagpainawaan na paubat hén nayari nay na ya pamanyag hén boon luta.

⁴ Gawan main yan impahulat hi Apo Namalyari ha Kahulatan na ya tungkol ha ikapiton allo, ya êmén di, “Haka ha ikapiton allo ay nagpainawa hi Apo Namalyari hén nayari nay na ya pamanyag hén kaganawan dinyag na.”*

⁵ Omanén tamon ihipén ya impahulat ni Apo Namalyari, ya wanana hulat, “Taganán a hilay na makahowén ha pagpainawaan ya in-il-an ko.”

* **4:4** Genesis 2:2.

⁶ Hilay unan nakagilam hēn mangangēd ya habi ya tungkol ha pagpainawaan ni Apo Namalyari, ay a nakahowēn gawan ha pamanalanghang la. Êmbayro man, ay labay ni Apo Namalyari ya main makahowēn ha pagpainawaan ya in-il-an na.

⁷ Kabay hēn nakalabah hēn nabuyot ya panaon, ta panaon ana lan Arin David, ay andyanan na pon ni Apo Namalyari hilay angkabiyay hēn habayto hēn panaon hēn makahowēn ha pagpainawaan na. Muwang tamoy habayto, ta makwa tamo ha impahabi na kan Arin David, ya wana, “Amêhēn.” di ha habi ya inungkat kina, ya wanana habi, “Amêhēn, no nagilam yoy hinabi ni Apo Namalyari,
ay a yoy na pakdêyēn ya ulo yo.”

⁸ Ya bansan Canaan ya pinaylakwan ni Josue kanlan ninuno tamon Israelita, ay alwan habaytoy pagpainawaan ya impangako ni Apo Namalyari, ta no habayto dayi ya logal, ay a yay na nangungkat hi Apo Namalyari hēn kaatag pon ya panaon.

⁹ Ha maparah ya habi, ay main nakal-an ya pagpainawaan para kanlan ampaniwala kan Apo Namalyari nanad ha pagpainawaan na ha ikapiton allo.

¹⁰ Ta hilay makahowēn ha pagpainawaan na, ay makapagpainawa ha dyag la hēn nanad kana.

¹¹ Kabay paka-pakikwanan tamo hēn makahowēn bayro, ta êmēn a kitamo mag-in nanad kanlan unan a nakahowēn gawan a la hinonol ya kalabayen ni Apo Namalyari.

¹² Ta ya habi ni Apo Namalyari, ay nanad angkabiyay, ya madyag ngan ya dapat daygēn hēn

main kapangyarihan. Ya anhabiēn na ay nanad êtak ya napikapaka ya ngalab, ya ayn kapantag ya tarêm, ya ampakataloh ha pilingoan haka uték hêñ but-o. Habaytoy habi na ay ampakataloh ha nakêm haka ihip ta ampakaawah yan an-ihipêñ tamo haka hêñ labay tamon daygêñ.

¹³ Ayn hinoman ya makapagtago kan Apo Namalyari, gawan mambatol ya balang miha ha hêlêk na, haka pakibatan tamo kana ya kaganawan dinyag tamo.

Hi Apo Jesu-Cristo ay pinakapoon pari ya ayn kapantag

¹⁴ Magpakanîêh kitamo ha paniwala tamo ya an-ipamwang tamo, gawan hi Apo Jesus, ya Anak ni Apo Namalyari, ay pinakapoon pari[†] ya ayn kapantag, ya atsi yana ha langit ha ampaidyanan ni Apo Namalyari.

¹⁵ Main kitamon pinakapoon pari ya taganán ampandámay hêñ mangêd kantamo ta nadanasan na ya hinon tukso hêñ nanad ha tukso ya lumatêng kantamo, noa, hiya ay taganán a natukso hêñ nanyag kasalanan.

¹⁶ Kabay a kitamina mag-alangan hêñ pakarani kan Apo Namalyari ya maingaloén, ta êmên na kitamo maingalwan hêñ mahawpan ha oras hêñ mangailangan kitamo.

5

¹ Kantamon Israelita, ya balang pinakapoon pari tamo, ay ampiliêñ ni Apo Namalyari kanlan kapareho tamo, ta habaytoy pinakapoon pari ay

[†] **4:14** Hebreo 2:17.

mámilatan tamo, ya ampam-in pahalamat haka ampamiátang ta êmén mapatawad ya kasalanan.

² Hiyay ampandámay hêñ mangêd kanlan nakadyag kasalanan, gawan hiya man ay tawon bat ya main pamagkulang kan Apo Namalyari.

³ Kabay hiya man, ay ampam-i êt hêñ átang para ha sarili nan kasalanan, alwan bat para ha kasalanan lan kaatag.

⁴ Haka ya mag-in pinakapoon pari ay ampliên ni Apo Namalyari, hêñ nanad ha pamili na kan Aaron ya unan pari tamon Israelita. Alwan pinakapoon pari ya ampamili hêñ sarili na hêñ dyanan karanganlan hêñ mag-in pinakapoon pari.

⁵ Êmbayro êt hi Apo Jesu-Cristo, ay a namili hêñ sarili na hêñ dyanan karanganlan hêñ mag-in pinakapoon pari, ta hi Apo Namalyari ya namili kana, haka naghabi kana, ya wana,

“Hika ya Anak ko,

haka amêhêñ impamwang ko ya hiko ya Tatang mo!”*

⁶ Bayo impahulat na êt ni Apo Namalyari ha Kahu-latan ya,

“Ya pangapari mo ay ayn angaan,

hêñ nanad ha pangapari ni Melquisedec ya ayn anggaan.”†

⁷ Hêñ atsi ya pon di ha luta hi Apo Jesus, ay nakiingalo yan nanalangin kan Apo Namalyari, ya makapiligtas kana ha kamatsan. Ha panalangin nan boon nakêm, ay in-ikhaw nay habi na hêñ main kalamoy hadyay tangih, haka nagilam ya

* **5:5** Awit 2:7, Dyag 13:33, Hebreo 1:5. † **5:6** Awit 110:4.

panalangin na, gawan ha pagpakaaypan nakêm na ha pamanhumonol kan Apo Namalyari.

⁸ Anak ya man ni Apo Namalyari, ay gawan ha hadyay kairapan ya dinanan na, ay naintindihan na ya labay habiên hêñ mag-in mahonol.

⁹ Haka gawan ayn pamagkulang ha pamanhumonol na ha impadyag kana ni Apo Namalyari, ay hiyay nag-in ampangubatan hêñ ayn anggay kaligtasan lan kaganawan ya ampanhumonol kana,

¹⁰ gawan hiyay pinili ni Apo Namalyari hêñ mag-in pinakapoon pari hêñ nanad ha ayn angga ya pangapari ni Melquisedec.

*Kaillag kitamo ta kayno matalibatokan tamoy
paniwala tamo*

¹¹ Mal-at pon dayi ya labay naêñ habiên kamoyu ya tungkol ha pangapari ni Apo Jesu-Cristo haka ya pangapari ni Melquisedec, noa, mairap hêñ ipalinaw ya habayto kamoyu, ta nanad ayn nanan anhumwêñ ha ihip yo.

¹²⁻¹³ Ha kaptêgan, ay nabuyot kaw nan ampaniwala, kabay dapat dayi, ay maaralan yoy nay kapareho yo, noa, angga amêhêñ kailangan yo pon êt hêñ patoro ha unan intoro kamoyu ubat ha habi ni Apo Namalyari. Ya kaalimbawaan yo ay anak ya ampanoho pon ya a ampakagatbat hêñ mantêg pamangan. Ya labay habiên ya a yo pon mamwangan no hinoy mangêd ya dyag haka no hinoy narawak ya dyag.

¹⁴ Ta ya malalê ya toro ya maialimbawa ha mantêg ya pamangan ay para kanlan manakêm, ta nalêmaw hilay nan mamili no hinoy mangêd

ya dyag haka mamalay hēn mangara ha alwan mangêd ya dyag.

6

¹ Kabay a tamina orongên bat ya unan intoro kantamo ubat ha habi ni Apo Namalyari ya tungkol kan Apo Jesu-Cristo, noa, paulayan tamo hēn mapahanan ya pamangintindi tamo ta êmên kitamo mag-in manakêm. Alwa taminan piorong-orongan hēn pag-aralan bat ya unan intoro kantamo, ya dapat paghêhêan hēn talibatokan ya manyag hēn ayn pukat haka dapat maniwala kan Apo Namalyari,

² haka ya toro ya tungkol ha pamawtismo, ya paypalunto hēn gamêt no ihalangin hilay binawtismoan, ya pangoman mabiyay hēn hilay natsi, haka ya parusa ya ayn anggaan.

³ Kabay ha hawop ni Apo Namalyari, ay pahanan tamo ya kamwangan tamo ya tungkol ha paniwala kan Apo Jesu-Cristo.

⁴ Ta hilay nanalibokot ha unan intoro kanla ay ahina makaorong hēn maniwala kan Apo Jesu-Cristo. Mana hilay nan nahawangan hēn Espiritu ni Apo Namalyari haka nadanasan lay nay kapangyarihan na haka ya ayn kapantag ya ingalo na.

⁵ Naranasan la êt no ay-êmên kakangêd ya habi ni Apo Namalyari haka ya kapangyarihan na ya iubuh nay nan ipamwang lano.

⁶ No tinalibatokan lay habayto, ay a hilay na makaorong kan Apo Jesu-Cristo, ta nanad ha impako la yan oman ha koros hēn impakarêng-êy ha arapan hēn kal-atan.

7 An-ingalwan ni Apo Namalyari ya hilay ampaniwala, ya nanad luta ya panay angkauranan, haka angkatuboan hên kal-atan tanaman ya mapakinabangnan.

8 Noa, no antumabon ya habaytoy luta hên tanyuong haka kinêw ya nipagdiwi, ay ayn yan pukat. A mabuyot ay ihumpa ya habayto bayo ulamên. Êmbayro êt ay parusaan ni Apo Namalyari hilay nanad hatoy luta ya antumabon.

9 Anlugurên naêñ patêl, êmbayro man ya pamanulat naêñ, ay angkasigurado naêñ ya a malyari kamoyu ya êmbayro, ta madyanan na kaw ni Apo Namalyari hên ikakangêd yo, ya an-idin na kanlan atsi ha dann hên kaligtasan.

10 Taganán makatoynungan ya. A na liwaan ya dinyag yo ha ikakangêd na, haka ya pamanlugud yo kana, ya impahlék yoy na, haka ya an-ipahlék yo angga amêhêñ ha pamanawop yo ha kapareho yon pinili na hên mag-in kana.

11 Labay-labay naêñ dayi hên mahêlêk ha balang miha kamoyu ya ihundo yoy habaytoy pamanlugud yo angga ha anggaan, ta êmêñ sigurado yon matanggap ya an-êngganan yo.

12 A naêñ labay ya mag-in mabarog kaw ha pamanhumonol kana, ta labay naêñ hên totoêñ yo hilay naniwala haka nagtêêh, ya hilay makatanggap hên impangako na.

Ya impangako ni Apo Namalyari ay sigurado

13 Hêñ nangako ya hi Apo Namalyari kan apo Abraham, ay nanumpa ya ha sarili na ya tuparêñ nay habayto gawan ayn makapangyarihan kana.

14 Wani Apo Namalyari kan apo Abraham, “Anipangako ko kamo ya ingalwan kata haka pakalatêن ya mag-in kaapo-apoan mo.”*

15 Hi apo Abraham ay nagtêêh hêن nangênggan hêن angga ha natanggap nay habaytoy impangako kana.

16 No hikitamoy ampanumpa, ay ampanggamit kitamon langan hêن mihay makapangyarihan kantamo, haka no main manumpa, ay sigurado ya habayto.

17 Embayro êt, hêن nangako ya hi Apo Namalyari kan apo Abraham, ay nanumpa ya, ya tuparêن nay habayto. Dinyag nay habayto, ta êmên na maipahlêk kanlan pinangakoan na, ya a ampan-goman ya anhabiêن na.

18 Atsi kantamo ya pangako na haka ya humpa na, ya a maoman gawan a ya ampaglaram. Kabay malyarin mag-in makhaw ya nakêm tamo ya tam-pol hêن nagpahawop kana, hêن nangênggan ha impangako na kantamo.

19 Habaytoy an-êngganan tamo kana, ay ampataniêh hêن paniwala tamo. Ta ya paniwal-an tamo ay hi Apo Jesus ya nanad nakadann ana ha pinagpênlan bayro ha Pinakabanal ya Kuwarto ha Templo ha langit ha arapan ni Apo Namalyari.

20 Nuna yay na bayro hi Apo Jesus hêن nag-in mamilatan tamo kan Apo Namalyari ta hiyay nag-in pinakapoon pari hêن ayn anggaan, hêن nanad ha pangapari ni Melquisedec.

* **6:14** Genesis 12:4, 22:16-17, 25:26.

Ya tungkol kan Melquisedec ya pari ni Apo Namalyari

¹ Hi Melquisedec* etaman, ay ari ha balayan Salem haka pari ni Apo Namalyari. Hêñ haton lagi, hêñ ubat hilan apo Abraham hêñ nanambut kanlan apat ya ari, ay hi Melquisedec ya nanupa kana haka inhalangin na ya, ya ingalwan na ya ni Apo Namalyari.

² Bayo indin ni apo Abraham kan Melquisedec ya ikamapo hêñ nakwa na kanlan ari ya nahambut na. (Ya labay habiêñ hêñ langan Melquisedec, ay “Ari hêñ Katoynungan.” Ya labay habiêñ hêñ Salem ay “kapatêkbêkan.” Gawan hiyay ari ha balayan Salem, ay hiyay “Ari hêñ Kapatêkbêkan” etaman.)

³ Ayn inungkat hêñ tungkol ha toa haka ninuno na. A êt inungkat no nakano yan in-anak o no nakano yan natsi. Ya pangapari na ay nanad ha pangapari nan Anak ni Apo Namalyari ya ayn angaan.

⁴ Ihipêñ tamo ya matag-ay ya tungkulon ni Melquisedec, ta hi apo Abraham man, ya ninuno tamo, ay nam-i kana hêñ ikamapo ha nakwa na kanlan ari ya nahambut na.

⁵ No kaapo-apoan ni Levi dayi hi Melquisedec, ay maparah tamon maintindihan no awta hiyay dinyanan hêñ ikamapo ni apo Abraham. Ta hikitamoy Israelita, ay anhumonol ha utoh ya dapat kitamon mam-i hêñ ikamapo ha angkapopol tamo, haka ha kaganawan pinagpagalan tamo, kanlan kaapo-apoan ni Levi ya magpari kantamo,

* **7:1** Genesis 14.

pare-pareho kitamo man kaapo-apoan ni apo Abraham.

⁶ Noa, hi Melquisedec, ay alwan kaapo-apoan ni Levi, êmbayro man, ay hiyay dinyanan ni apo Abraham hên ikamapo. Haka hiyay nanalangin ya ingalwan ni Apo Namalyari hi apo Abraham agyan hi apo Abraham, ya pinangakoan ni Apo Namalyari hên hato.

⁷ Muwang tamo ya matag-ay ya tungkulon nan ampanalangin kanan an-ihalangin na. Bayro tamo mamwangan ya matag-ay ya tungkulon ni Melquisedec kanan tungkulon ni apo Abraham.

⁸ Haka hilan kaapo-apoan ni Levi ya andyanan hên ikamapo, ay angkamatsi. Noa, hi Melquisedec etaman, ay nanad angkabiyay ya pon, gawan ayn kitamon mabáha ha habi ni Apo Namalyari ya hiya ay natsi.

⁹ Malyari êt habiên ya hilan Levi ya ampanang-gap hên ikamapo, ay nanad kalamo ni apo Abraham hên nam-in ikamapo kan Melchizedec,

¹⁰ ta hi Levi ay kaapo-apoan ni apo Abraham, haka a ya pon in-anak hên nam-i yan ikamapo kan Melchizedec hi apo Abraham.

Ya pangapari ni Panginoon Jesu-Cristo, ay nanad ha ayn anggay pangapari ni Melquisedec

¹¹ Ha pam-i ni Apo Namalyari hên Kautuhan kanlan ninuno tamon Israelita, ay tinalagá na ya hilay kaapo-apoan ni Levi ay mamaala ha pamiátang kana. Noa, ya pamiátang la ha pangapari la, ay a makapakangêd hên tawo. Kabay kailangan lay pari, ya nanad ha pangapari ni

Melquisedec, alwa hēn nanad ha pangapari ni Aaron ya kaapo-apoan ni Levi.

¹² Haka no kailangan hēn hagilyan ya pangapari, ay kailangan êt hēn hagilyan ya Kautuhan tamon Israelita.

¹³⁻¹⁴ Muwang tamo ya nahagilyan ya habaytoy pangapari gawan hi Panginoon Jesu-Cristo ya in-hagili ni Apo Namalyari ha pangapari lan kaapo-apoan ni Levi, ay alwan kaapo-apoan ni Levi ta hiyay kaapo-apoan ni Juda. Haka ayn yan hinabi hi apo Moises ya main kaapo-apoan ni Juda ya mag-in pari bayri ha luta.

¹⁵ Nag-in malinaw ya hinagilyan ya manan pangapari, hēn nilumatêng ya kaatag ya pari ya nanad kan Melquisedec.

¹⁶ Habaytoy pari ay pinili hēn alwan gawan ha ninuno na, ha pamanhumonol ha Kautuhan. Noa, hiyay pinili gawan ha kapangyarihan na hēn hinambut nay kamatsan. Hiyay alwan kaatag no alwa hi Panginoon Jesus. (Haka ya habaw hēn ubas etaman ya ampihipwak, ay alwan kaatag no alwa ya daya ya in-alimbawa ha habaw hēn habaytoy ubas.)

¹⁷ Ta êmén di ya impahulat ni Apo Namalyari ya tungkol kana,

“Hika ya mihay pari ya ayn anggaan, hēn nanad ha pangapari ni Melquisedec ya ayn anggaan.”

¹⁸ Kabay hinagilyan ya manan utoh hēn tungkol ha pangapari ni Levi gawan habayto ay main pamagkulang. Haka habaytoy utoh ay

¹⁹ a nakapakangêd hēn tawo ha hêlêk ni Apo Namalyari. Noa, gawan kan Panginoon Jesus ya

inhagili ha pangapari lan kaapo-apoan ni Levi ay ampakarani kitamina kan Apo Namalyari hēn ayn pamagkulang ha hēlēk na.

20-21 Ya pangapari lan kaapo-apoan ni Levi, ay ayn kalamoy pangako. Noa, ya pangapari ni Panginoon Jesus ay main kalamoy humpa ni Apo Namalyari, gawan wani Apo Namalyari,

“Hiko ya Panginoon ya nangako,
haka a mangoman ya ihip ko,

‘Hika ay pari hēn ayn anggaan!’ ”[†]

22 Kabay hi Panginoon Jesus ay nag-in kasiguradoan hēn bayoy kahundoan ni Apo Namalyari ha tawo ya mangēd ha unan kahundoan.

23 Haka mal-at ya kaapo-apoan ni Levi ya honolhonol hēn nag-in pari gawan hila ay tawo bat ya main anggaan ya biyay.

24 Noa, ya pangapari ni Panginoon Jesus ay ayn angga, ta hiyay angkabiyay hēn ayn angga.

25 Gawan a ya matsu hi Panginoon Jesus, ay ayn angga ya kapangyarihan na hēn mamiligtas kanlan ampaniwala ya hiyay makapaidani kanla kan Apo Namalyari. Gawan hiyay ampamiyay hēn ayn angga hēn ampakihabi kan Apo Namalyari hēn para kantamo.

26 Kabay hiyay pinakapoon pari ya kailangan tamo ya banal, ya taganán ayn kapintasan. Hiyay alwan nanad kantamo ya makasalanan, haka hiyay dinyanan kapangyarihan ya ayn kapantag ha langit.

[†] **7:20-21** Awit 110:4.

²⁷ Hiyay alwan nanad kanlan pinakapoon pari ya ampamiátang hên allo-allo, hên para ha sarili lan kasalanan, haka para ha kasalanan lan kaatag. Ta minghan nan bat in-átang ya sarili na para ha kasalanan tamo, haka hukad ya habayto. Ahina hên kailangan omanêñ o pahanan pon ya habayto.

²⁸ Ha pamanhumonol ha Kautuhan ni apo Moises, ay tawon bat, ya main pamagkulang kan Apo Namalyari ya pinili hên mag-in pinakapoon pari. Noa, gawan ha bayoy kahundoan ni Apo Namalyari ya main humpa, ay pinili nay Anak na hên mag-in pinakapoon pari, ya banal hên angga-angga.

8

Hi Apo Jesu-Cristo ya mamilatan ha bayoy kahundoan ni Apo Namalyari ha tawo

¹ Habaytsi ya maalagá ya labay naén hên mamwangan yo: ha dapit panabtab ni Apo Namalyari ha langit, ay main kitamon banal ya pinakapoon pari ya ampamaala hên kalamo ni Apo Namalyari.

² Yabay ya hi Apo Jesus ya pinakapoon pari ya ampaghuyoy na ha mantêg pagsimbaan ha langit ya dinyag ni Apo Namalyari, alwan tawo.

³ Di ha luta, ya balang pinakapoon pari, ay main tungkulán hên mam-in digalo haka mamiátang kan Apo Namalyari, ta êmén mapatawad ya

kasalanan. Kabay kailangan ni Panginoon Jesus, ya pinakapoon pari tamo, hēn main yan iátang.*

⁴ Noa, ya pangapari na ay alwan bayri ha luta, ta no atsi ya pon dayi di ha luta, ay alwa yan pari, gawan main nanan pari ya ampamiátang bayri ha pamanhumonol ha Kautuhan ni apo Moises.

⁵ Ya pamaghuyo la ay atsi ha pagsimbaan ha luta, ya nanad aninon bat hēn mantēg pagsimbaan kan Apo Namalyari ha langit. Ta hēn ipairēng na dayi ni apo Moises ya toldan pagsimbaan di ha luta, ay impapaka-utoh kana ni Apo Namalyari, ya wana, “Sakto mon ipairēng ya impahlēk ko kamo bayro ha tawgtug.”†

⁶ Noa, ya pamaghuyo ni Apo Jesus ay mangēd ha pamaghuyo lan kaapo-apoan ni Levi, gawan hi Apo Jesus, ay māmilatan ha bayoy kahundoan ni Apo Namalyari ha tawo. Ya bayoy kahundoan ay mangēd ha unan kahundoan haka main yan kalamoy pangako ya mangēd ha unan pangako.

⁷ No ayn dayin pamagkulang ya unan kahundoan, ay ahina dayi hēn kailangan hēn hagilyan hēn bayo ya habayto.

⁸ Noa, impamwang ni Apo Namalyari ya main pamagkulang ya hilay Israelita ha pamanhumonol ha unan kahundoan, ta wana,

“Lumatēng ya allo, ay manyag akon bayoy kahundoan kanlan kaapo-apoan ni apo Jacob, hilay ampaidi ha Israel haka hilay ampaidi ha Juda.

* **8:3** Hi apo Jesus etaman, ay alwan ayop ya in-átag na, ta indin nay lawini na. Mabáha ya habayto ha Hebreo 9:12. † **8:5** Exodus 25:40.

9 Habaytoy alwan nanad ha kahundoan ko ha ninuno la, hêñ infligtas ko hila ha pangaipoh la ha bansom Egipto.

A la hinonol ya kahundoan naêñ, kabay pinaulayan ko hilay na.

10 Habaytsi ya mag-in kahundoan ko kanlan Israelita,

lumatêng ya allo, ay itanêm koy utoh ko ha ihip la, ta êmêñ habaytoy nay labay lan honolêñ.

Hikoy mag-in Diyos la,
haka hilay mag-in anak ko.

11 A lay na kailangan hêñ miaaral.

A lay na êt hêñ kailangan hêñ habiêñ ha kapareho la, ya ‘Dapat mon kilalaêñ ya Panginoon, ya hiyay Diyos.’

Ta kanan habayto ay maubuh hilan makamwang kangko, hinoman ya tungkulon la ha biyay.

12 Ta patawarêñ ko hila ha pamanyag lan karawakan,

haka liwaan koy kasalanan la.”[‡]

13 Ha pangungkat ni Apo Namalyari hêñ bayoy kahundoan, ay labay habiêñ, ayn nanan pukat ya unan kahundoan, gawan habayto ay maranin maplak.

9

Ya pagsimbaan bayri ha luta haka ha langit

1 Ha unan kahundoan ni Apo Namalyari, ay mal-at ya patakaran no ay-êmêñ ya pamagsimba kana, haka tungkol ha tolda ya pagsimbaan kana.

[‡] **8:12** Jeremias 31:31-34.

² Habaytoy toldan pagsimbaan, ay main loway kuwarto ya pinagpêlan ya ilwangan. Ya unan kuwarto ya howênê, ay ambaêgêñ Kuwarto ya Banal. Atsi bayro ya paybul-ihan solo, haka ya lamisa ya nag puto, ya in-átang kan Apo Namalyari.

³ Main makogpaw ya takop ya pinagpêlan bayro ha ikalwan kuwarto ya pagsimbaan ya atsi ha pinakalalê, ya ambaêgêñ Kuwarto ya Pinakabanal.

⁴ Atsi bayro ya gintoy paybul-ihan* hêñ pay-paahukan hêñ pabango ha pamagsimba kan Apo Namalyari. Atsi êt bayro ya Baol hêñ Kahundoan, ya nilatopan hêñ ginto. Bayro ha lalêñ Baol ay nag silyaw ya dyag ha ginto ya nag laman hêñ habaytoy pamangan ya ubat ha langit ya ambaêgêñ manna. Atsi êt bayro ha Baol ya têkêñ ni Aaron ya nanlanubu, haka ya pinipakay bato ya pinamidukitan hêñ Kautuhan ni Apo Namalyari.

⁵ Ha babo hêñ takap hêñ habaytoy Baol, ay main impairêng ya nanad loway anghel[†] ya nag pakpak, ya pamaptêg ya atsi bayro hi Apo Namalyari. Angkahalokoban hêñ pakpak la ya takap hêñ habaytoy Baol, ya logal ya pamakikwaan ingalo. Noa, a naêñ pon iubuh hêñ maipalinaw ya habayto di ha hulat amêhêñ.

⁶ Êmbayro ya pangadyag ha lalêñ tolda ya pagsimbaan kan Apo Namalyari. Allo-allo hilan hinumwêñ ha unan kuwarto hilay pari ta bayro lan andaygêñ ya tungkulon lan magsimba.

* **9:4** Hêlkêñ ha panlêkan labay habiêñ hêñ habi. † **9:5** anghel: ya nakahulat ay kerubin. Hêlkêñ ha panlêkan labay habiêñ hêñ habi.

⁷ Noa, ya pinakapoon pari bat ya nakahowén ha ikalwan kuwarto haka minghan bat ha mihay taon. A ya nakahowén no ayn yan anggétan hén daya hén ayop ya iátang, ta êmén kikwan patawad ha kasalanan na, haka kasalanan nan kapareho nan Israelita, ya a la tinalagá.

⁸ Ha êmbayro, ay an-ipalinaw nan Espiritu ni Apo Namalyari, ya ayn bat ampakaarap kan Apo Namalyari no a maoman ya unan utoh hén tungkol ha pagsimbaan.

⁹ Habaytoy toldan pagsimbaan ha luta ay mapangwaan tamon aral amêhén. Habaytoy pam-in digalo haka pangiátang ta êmén mapatawad ya kasalanan lan nakadyag kasalanan, ay a makapatékbék hén nakém lan ampagsimba gawan a hila makaalih hén kasalanan.

¹⁰ Habaytoy utoh ay panay tungkol bat hén lawini hén nanad ha hinoy bawal hén tungkol ha pamangan, inêmén haka pamaglinis hén lawini. Habaytoy dapat honolén angga ha a pon indin ni Apo Namalyari ya bayoy kahundoan.

¹¹ Noa, amêhén nilumaténg hi Apo Jesu-Cristo, hén nag-in pinakapoon pari tamo haka magbélékébék ha béké tamo ya kangérán ya ubat ha bayoy kahundoan. A ya ampaghuyo ha pagsimbaan lan ninuno, ta atsi yay na ha langit ha manténg pagsimbaan kan Apo Namalyari. Habaytoy mangéd ha pagsimbaan lan ninuno gawan a ya dinyag hén tawo haka ayn ya di ha luta ta atsi ya bayro ha langit.

¹² Ya pamanhumwén na bayro ay minghan bat, haka alwan gawan ha daya hén kambing o biseron baka, noa, ha sarili nan daya, ya pamayad

hēn parusan kasalanan tamo ta êmēn kitamo miligtas hēn angga-angga.

13 Main pukat ya inwihik ya daya hēn kambing, baka haka abo hēn in-ulam ya biseron baka, ya inwihik ha ninuno tamo. Habaytoy nakalinis kanla ha kaganawan dinyag lay nakarêmék kanla, ta êmēn matanggap ni Apo Namalyari ya pamagsimba la.[‡]

14 Noa, taganán makapangyarihan ya daya ni Apo Jesu-Cristo kanan daya lan habaytoy ayop. Awo, gawan bay, ha kapangyarihan nan Espiritu ni Apo Namalyari, ya ampamiyay hēn ayn angga, ay indin ni Apo Jesu-Cristo ya biyay na, ya ayn kapintasan. Habaytoy daya na ay nakalinis hēn nakém tamo ha kaganawan dinyag tamo ya ayn pukat. Kabay makapagsimba kitamo kan Apo Namalyari ya angkabiyay.

15 Kabay hi Apo Jesu-Cristo ay mamilatan bayro ha bayoy kahundoan ni Apo Namalyari ha tawo, ta êmēn hikitamoy pinili ni Apo Namalyari hēn mag-in kana, ay madyanan biyay ya ayn anggaan. Habaytoy malyari gawan ha pangamatsi na, ya nangakbus kantamo ha parusa hēn kasalanan tamo, ya a kitamo hinumonol ha unan kahundoan.

16 Habaytoy nanad ha mihay mabandi ya main hulat no hinoy pamibalagan nan pibandian na no matsi ya. Ayn makinabang hēn habayto angga ha mapaptégan ya natsi yay nay mabandi,

17 ta habaytoy hulat ay ayn pukat kaban angkabiyay pon ya mabandi.

[‡] **9:13** Bilang 19:1-18.

18 Êmbayro êt ha unan kahundoan, main pinatsi, bayo nagkamain alagá ya habaytoy kahundoan. §

19 Alimbawa hi apo Moises hén naipamulah nay Kautuhan kanlan kapareho nan Israelita, ay nangwa yan daya hén kambing haka biseron baka ya pinatsi la, bayo pinahanan nan lanêm. Nangwa yan naorit ya habot tupa ya impêtêh na ha yagaw hén isopo haka na indérê ha daya ta inwihik na ha tawo haka ha naka-tsili-tsili ya papel ya pinangihu-latan hén Kautuhan.

20 Kaban andaygén nay habayto ay wani apo Moises, “Hata daya ay pamaptêg ya maalagá ya hata kahundoan ya an-ipahonol kamoyu ni Apo Namalyari.”

21 Winihikan na êt ya toldan pagsimbaan la kan Apo Namalyari haka ya anggamitên la ha pam-aggsimba la.

22 Ha pamanhumonol ha Kautuhan, ay ayn angkalinisan, no ayn pon ipadaya ya ayop. Êmbayro etaman ayn kapatawaran ha kasalanan no ayn ipadaya.*

23 Habaytoy toldan pagsimbaan ay nanad anion bat hén mantêg pagsimbaan kan Apo Namalyari ha langit. Êmbayro man, ay habaytoy kailangan hén malinisan hén dayan ayop, kabay habayto etaman ya mantêg pagsimbaan kan Apo Namalyari ha langit, ay kailangan hén daya ni Apo Jesu-Cristo ya maalagá ha dayan ayop.

§ **9:18** Ha kaugalian lan Israelita, ay no main lowa kanla ya main kahundoan, ay mamatsi hila pon hén hinon ayop ta êmén magkamain pukat ya habaytoy kahundoan. Genesis 15. * **9:22** Levitico 17:11.

24 Ta mantêg pagsimbaan kan Apo Namalyari ha langit ya hinowênan ni Apo Jesu-Cristo hên nag-in mamilatan kantamo hên angga-angga. A ya hinumwêñ ha pinakalalêñ pagsimbaan ha luta, ya nanad aninon bat hên mantêg pagsimbaan.

25 Ya dinyag ni Apo Jesu-Cristo, ay minghan bat, alwan nanad kanlan pinakapoon pari ya taon-taon hên ampantan hên daya hên ayop ha Pinakabanal ya Kuwarto ya atsi ha pagsimbaan lan ninuno. A na kailangan hên pioman-oman hên mamiátang lawini na.

26 Ya pamiatang nan sarili na, ay minghan bengat, haka hépat ya habayto hên angga ha anggaan hên luta. No alwa dayi hên êmbayro, ya minghan bengat, ay kailangan dayi ya paoman-oman ya pangamatsi na paubat hên dinyag ya luta ta êmén maalíh ya kasalanan.

27 Tinalagá ni Apo Namalyari ya maubuh kitamon matsi hên minghan bengat, bayo hatolan ana.

28 Êmbayro êt hi Apo Jesu-Cristo ay minghan bat hên natsi ha pangalíh hên kasalanan hên kal-atan. Kabay ha pag-orong na di ay a yay nan matsin oman gawan ha kasalanan tamo, noa, mag-orong ya, ta êmén na kowêñ hilay taganán ampangênggan kana.

10

Ya pamiatang ni Apo Jesu-Cristo hên sarili na, ay ayn kapantag

1 Ya Kautuhan ni apo Moises, ay nanad aninon bat hên kangêran ya antanggapêñ tamo gawan kan Apo Jesu-Cristo, haka habaytoy pangiátang

hēn taon-taon, ta êmēn mapatawad ya kasalanan lan nakadyag kasalanan, ay a makapibanal hēn nakêm lan ampagsimba hēn angga-angga.

² No ampakaalih dayi hēn kasalanan hēn angga-angga, ya pangiátang la, ay a hila dayin angkabyatan ha kasalanan la, haka itêgêñ la dayi ya pangiátang la.

³ Noa, ha kaptêgan, ay habaytoy pangiátang la hēn taon-taon, ay ampamipaihip kanla ya makasalanan hila.

⁴ Ta ya daya hēn baka o kambing, ay taganán a makaalih hēn kasalanan.

⁵ Kabay hēn nilumatêng yay na bayri ha luta hi Apo Jesu-Cristo, ay wana kan Apo Namalyari, ya Tatang na,

“A mo labay ya hinon ayop o kaatag pon ya an-iátang kamô hēn tawo,
kabay pinaglêan mo kon lawini ya panluta.

⁶ Taganán a mo an-ikahigla ya hinon ayop ya ulamên hēn pangiátang
ha pamakikwan patawad ha kasalanan.

⁷ Bayo wangko, ‘Apo Namalyari, atsi ko di, hēn manyag kalabayan mo,
hēn nanad ha nakahulat ha Kahulatan ya impahulat mo, ya tungkol kangko.’”*

⁸ Pakaihipên tamo ya hinabi ni Apo Jesu-Cristo. Wana ya a na taganán labay ni Apo Namalyari ya hinon ayop o kaatag ya an-iátang, haka a na etaman labay-labay ya hinon ayop ya ulamên ha pamakikwan patawad ha kasalanan, habayto man ay in-átang ha pamanhumonol ha Kautuhan.

* **10:7** Awit 40:6-8.

⁹ Bayo wana êt, “Haka atsi ko di, hên manyag kalabayan mo.” Ha pangahabi nan habayto ay malinaw ya hinagilyan ni Apo Namalyari ya kamatsan ni Apo Jesu-Cristo ha manan an-iátang.

¹⁰ Haka hinonol ni Apo Jesu-Cristo ya kalabayan ni Apo Namalyari. Miminghan nan in-átang ya sarili na haka hikitamoy niluminis ha kasalanan tamo, hên dinyag hên ayn kapintasan ha arapan ni Apo Namalyari.

¹¹ Ha manan kahundoan ay allo-allo hilan nakairêng hilay pari hên antuparêñ ya tungkulon la. Panay hilan ampamiátang hên a ampakaalih hên kasalanan.

¹² Noa, hi Apo Jesu-Cristo, ay kaminghan nan in-átang ya sarili na ta êmén maalih ya kasalanan hên angga-angga. Hên nayari nay na ya habayto, ay nikno yay na ha dapit panabtab ni Apo Namalyari hên ampamaala hên kalamo na.

¹³ Bayro nay nan an-êngganan hên angga ha mapahbut ni apo Namalyari ya kapatsi na.

¹⁴ Kaminghan nan in-átang ya sarili na ta êmén na hila dinyag banal hên angga-angga, ya hilay pinili ni Apo Namalyari hên impapawa hên mag-in kana.

¹⁵ Haka ya Espiritu ni Apo Namalyari, ay am-pamaptêg hên habayto kantamo gawan ha impahulat na, ya êmén di,

¹⁶ “Wanan Panginoon, ‘Habaytsi ya mag-in kahundooan ko kanlan Israelita lumatêng ya allo: Itanêm koy utoh ko ha ihip la, ta êmén habaytoy nay labay lan honolên.’ ”[†]

¹⁷ Bayo wana êt,

[†] **10:16** Jeremias 31:33.

“Haka liwaan kinay kasalanan la haka pamanyag lan karawakan.”

18 Kabay no napatawad ya kasalanan, ay malinaw ya ahina kailangan hēn mangiatang.

Ampakapakidani kitamina kan Apo Namalyari

19 Hikaw ya patēl ko ha Panginoon, gawan ha daya ni Apo Jesus, ay makhaw ya nakêm taminan makiarap kan Apo Namalyari, hēn nanad ha ampakahowêñ kitamina ha Kuwarto ya Pinakabanal.

20 Ta ha pamiâtang nan lawini na, ay nanad nawakwak hēn naloat ya makogpaw ya takop ya pinagpêñlan bayro ha pinakabanal ya kuwarto.[‡] Kabay nakaloat ya bayoy dann ya palako kan Apo Namalyari. Habaytoy dann ay ayn kaatag no alwan hi Apo Jesus ya ampamiyay hēn ayn angga.

21 Hiyay pinakapoon pari tamo ya ampamaala ha pamilya ni Apo Namalyari.

22 Kabay dapat boon nakêm haka nataniêh ya paniwala tamo ha pamakiarap kana. Ta ya muwang tamo ay nalinisan kitamina ha balang kasalanan ta nanad winihikan daya na, ya karawakan nakêm tamo, haka nanad nalinisan ya lawini tamo hēn lanêm ya ayn kapantag ha kalinawan.[§]

23 Pakataniêhēn tamoy pamagtsiwala tamo kana, ya main kitamon maêngganan kana hēn ayn pamag-alangan, gawan hi Apo Namalyari ya nangako, ay tapat.

[‡] **10:20** Marcos 15:38. [§] **10:22** Exodus 29:21, Exodus 29:4, 30:17-21, 40:30-32, Ezekiel 36:25.

24 Haka pakaihipên tamo no ay-êmên kitamon mapukaw hên kaihipan hên kapareho tamo hên milulugud haka manyag kangérān.

25 Haka paan tamon tuwarêñ ya kaatag ya ahinan ampi-tsi-tsipon hên magsimba, noa, kailangan mipapakhaw kitamon nakêm ha miha ta miha, laloy na amêhén, ta angkahêlêk tamina ya marani yanay pamag-orong hên Panginoon.

26 No muwang tamina ya kaptêgan ya tungkol kan Apo Jesus, bayo ihundo tamo pon êt ya pamanayag kasalanan, ay ayn nanan maiátang ha ikapatawad hên kasalanan tamo.

27 Ta ya maêngganan tamo, ay kapapalimoy kaprusaan ha apoy ya man-alob, ya mangulam ha kaganawan ya nag-in kapatsi ni Apo Namalyari.

28 Ihipên tamo ya pinatsi hên ayn ingalo ya hinoman ya nanalanghang ha Kautuhan ni apo Moises, no main lowa o tatloy tistigos ya namaptêg ha dinyag nay kasalanan.*

29 Mabyat pon bayro ya pamarusa ha kaganawan ya naniwala pon bayo nanalibokot ha Anak ni Apo Namalyari. Ta ha pamanalibokot la, ay intad lan ayn pukat ya daya na, ya namaptêg ha bayoy kahundoan ya nangalih hên kasalanan la hên naniwala hila. Haka ha dinyag lan habayto, ay minusmus la êt ya Espiritu ni Apo Namalyari, ya nangingalo kanla. Kabay taganán mabyat ya parusa kanla.

30 Ta muwang tamina ya kapangyarihan ni Apo Namalyari ya naghabi, “Hiko ya manumbah, hên mamarusa kanla.” Haka wana êt, “Hiko ya Pang-

* **10:28** Deuteronomio 17:2-7.

noon ya manatol ha pinili ko hēn mag-in maának ko.”[†]

31 Taganán kapapalimo hēn malatngan ya pamarusa ni Apo Namalyari ya angkabiyay hēn ayn angga.

32 Noa, ihipêñ yo hēn haton babayo kaw hēn naniwala kan Apo Jesu-Cristo, ya nadanasan yo man hēn hadyay pamairap, ay nagtêh kaw.

33 Ha arapan hēn kal-atan, ay minusmus kaw, haka pinairapan. Bayo no êmbayroy dinyag la ha kalamo yo, ay andamayan yo hila etaman.

34 Ta iningalwan yo hilay inhukul gawan ha paniwala la kan Apo Jesu-Cristo. Haka hēn main nangayun bandi yo, ay pinaulayan yo hila hēn main kahiglaan, gawan muwang yo, ya ha langit ay main kaw hēn matanggap ya ayn angga ya mangêd ha bandi.

35 Kabay pataniêhēn yoy paniwala yo kan Apo Namalyari, gawan main kaw hēn maêngganan kana ya primyo ya ayn kapantag ha kangêran.

36 Dapat kaw hēn mag-in mapagtêh ha pamanhumonol yo ha kalabayan ni Apo Namalyari, ta êmén yo matanggap ya impangako na.

37 Gawan main yan impahulat ya wana,
“Marani yanay pamanlumatêng nan habaytoy
lumatêng.

A nan paulayan ya main mangabala ha pamanlumatêng na.

38 Hilay an-itad kon ayn kasalanan, ay dyanan biyay ya ayn angga gawan ha paniwala la.

† **10:30** Deuteronomio 32:5-6.

Noa, hilay manalibokot ay a ko an-ikahigla.”[‡]

39 Habaytoy hinabi ni Apo Namalyari, noa, hikitamo etaman, ay alwa kitamon kalamo lan ampanalibokot ya ipapawa kan Apo Namalyari hên angga-angga, ta hikitamoy kalamo lan main paniwala ya dyanan biyay ya ayn angga.

11

Ya paniwala ya ayn kapantag

1 Ya paniwala, ay kasiguradoan ya matupad ya an-êngganan tamo, agyan a tamo pon angkahêlêk ya habayto.

2 Gawan bat ha paniwala lan ninuno tamo, ay hilay ingkahigla ni Apo Namalyari.

3 Gawan ha paniwala tamo kan Apo Namalyari, ay angkaintindihan tamo ya hên ayn pon angkahêlêk, ay dinyag nay luta ya angkahêlêk, ha habi nan bat.

4 Ihipêñ tamo hilay ninuno tamo ya ingkahigla ni Apo Namalyari. Alimbawa hi Abel, gawan ha paniwala na kan Apo Namalyari, ay mangêd ya átang na kanan in-átang hên kaka na hi Cain. Gawan habayto ay hiyay intad ni Apo Namalyari hên ayn kasalanan. Muwang tamo ya habayto gawan tinanggap ni Apo Namalyari ya átang na. Natsi ya man hên haton lagi, ay mamwangan tamo êt kana ya dapat magkamain kitamon paniwala.

5 Hi Enoc etaman, gawan ha paniwala na kan Apo Namalyari, ay a ya natsi. Hêñ angkabiyay ya pon, ay hiyay gintan ni Apo Namalyari ha langit,

[‡] **10:38** Isaias 26:20; Habacuc 2:3-4. Hêlkêñ etaman ha Roma 1:17 haka Galacia 3:11.

kabay hiyay ahina angkahêlêk ha luta.* Impahu-lat na êt ni Apo Namalyari, ya ingkahigla na hi Enoc, hên angkabiyay ya di ha luta hi Enoc.

⁶ Noa, no ayn kitamon paniwala, ay a kitamo ampakapahigla kan Apo Namalyari, ta no maki-ingalo kitamo kana, ay kailangan hên maniwala ya taganán main Diyos, haka tumbahan nan kangêran ya kaganawan ampakapakikwanan hên makamwang kana.

⁷ Hi Noe etaman, gawan ha paniwala na kan Apo Namalyari, ay ginilam nay impamwang ni Apo Namalyari kana, ya manyag yan barko, ta êmén hiya haka ya ahawa na haka maának na, haka hilay manuyang na ay miligtas.[†] Gawan ha paniwala na ay hiyay intad ni Apo Namalyari hên ayn kasalanan, haka nag-in malinaw ya dapat parusaan hilay a nagpalokop kan Apo Namalyari.

⁸ Hi apo Abraham etaman, gawan ha paniwala na kan Apo Namalyari, ay hinonol na êt ya utoh ni Apo Namalyari kana. Ta hên hiyay in-utoh ha logal ya impangako kana, ay nammita ya, a na man muwang no ay-iri ya lakwên na.

⁹ Gawan ha paniwala na, ay nagtêh yan nag-buyot hên nagpaidi ha tolda bayro ha logal ya impangako kana ha kaatag ya bansa. Embayro êt hên nagpaidi ha tolda, ya anak na hi Isaac haka hi Jacob ya apó na, ya kapareho ni apo Abraham hên pinangakoan ni Apo Namalyari hên habaytoy logal.

¹⁰ Nagtêh ya bayro hi apo Abraham, gawan an-êngganan nay paidyanan na ha napah-êy ya

* **11:5** Genesis 5:24. † **11:7** Genesis 6:9 angga ha 8:22.

balayan ha langit, ya tinalagá, haka impairêng ni Apo Namalyari.

¹¹ Hi Sara[‡] etaman, ya ahawa ni apo Abraham, ay gawan ha paniwala na, ya hi Apo Namalyari ay mapaypaniwal-an, ay nagkaanak ya, layuh ya man haka toa hilay nay miahawa.

¹² Agyan êndat ni apo Abraham ya a yay na magkaanak gawan mantêg yay nan toa, ay hiyay nag-in ninuno hên kal-atan ya a makwan mabilang êmén ha kal-at hên bêtêwêñ ya angkahêlêk ha langit haka baláh ha laylay dagat.

¹³ Hilay habaytoy inungkat ko, ay naniwala pon hên hilay natsi. A la man nakwa ya impangako kanla ni Apo Namalyari kaban angkabiyay hila pon, ay nanad lay na hên angkahêlêk ya habayto ha marayo, gawan ha paniwala la. Impamwang la ya hata luta ay alwa lan mantêg paidyanan.

¹⁴ Malinaw ya hilay êmbayroy pangahabi, ay main an-êngganan ya mantêg lan paidyanan ha langit.

¹⁵ Alwan ubatan la ya labay lan orongêñ, ta main hila man hên panaon hên mag-orong bayro, ay a hila nag-orong.

¹⁶ Noa, ya labay-labay lan lakwêñ, ay mangêd pon bayro ha ubatan la. Yabay ya balayan ha langit. Kabay a ya marêng-êý hi Apo Namalyari hên hiyay baégêñ lan Diyos la. Muwang tamoy habayto ta pinangil-an na hilan balayan.

¹⁷ Nahêlêk etaman ya nataniêh ya paniwala ni apo Abraham, hên hiyay in-utoh ni Apo Namalyari hên iátang ya anak na hi Isaac. Hiyay a

[‡] **11:11** Genesis 18:15; 21:1-2.

nanalanghang kan Apo Namalyari, hi Isaac man ya kamiha-mihaan nan anak ya impangako§ kana ni Apo Namalyari, hên wana,

18 ya hi Isaac ya mag-in ninuno hên kaapo-apoan na.

19 Naniwala ya, ya biyayê nan oman ni Apo Namalyari hi Isaac. Haka nanad biniyay yan oman hi Isaac, gawan no a ya dayi binawal ni Apo Namalyari, ay pinatsi nay na dayi hi Isaac.

20 Hi Isaac etaman, ay gawan ha paniwala na kan Apo Namalyari, ay inhalangin* na hilay anak na, hi Jacob haka hi Esau, ya ingalwan hila dayi ni Apo Namalyari ha arapêñ la.

21 Hi Jacob etaman, bayo ya natsi, ay gawan ha paniwala na kan Apo Namalyari, ay inhalangin† na ya loway anak ni Jose, ya ingalwan hila dayi ni Apo Namalyari ha arapêñ la. Bayo nagtêkêñ hi Jacob, haka sinimba na hi Apo Namalyari.

22 Hi Jose etaman, hên marani yay nan matsu, ay gawan ha paniwala na kan Apo Namalyari, ay impamwang nay pag-alih lan Israelita ha bansom Egipto, haka namiutoh ya kanla, ya ha pag-alih la ha bansom Egipto, ay gêtan lay but-o na hên iilbêng ha logical ya lakwêñ la.

23 Hilay toa etaman ni apo Moises, gawan ha paniwala la kan Apo Namalyari, ay a hila nali-mo hên nanalanghang ha utoh‡ hên ari ya dapat patsêñ ya kapianak ya lalaki. Hêñ nahêlêk lay mahampat ya nag-in anak la, ay intago la hi Moises hêñ tatloy buwan.

§ **11:17** Genesis 22:1-19. * **11:20** Genesis 27:1-40. † **11:21** Genesis 48:1-20. ‡ **11:23** Exodo 2:1-10.

24 Hi Moises etaman, ay hiyay hinayhay hēn anak ni Faraon, ya ari. Noa, hēn nagkanakēm yay na, ay gawan ha paniwala na kan Apo Namalyari, ay tinalibatokan nay habayto,

25 ta êmēn na makalamo hilay pinili ni Apo Namalyari hēn mag-in anak na, hadyay kairapan man ya angkaranasan la, kanan magpakapda hēn manyag kasalanan, ta muwang na ya a mabuyot ya habaytoy kahiglaan.

26 Ta inihip na, ya mangêd ya magdanas yan pammusmus gawan ha paniwala na ha Mesias, ya impangakon Mámiligtas, kanan iubuh kana ya pibandian ha bansan Egipto, ta an-êngganan nay matanggap na ha langit.

27 Gawan êt ha paniwala na kan Apo Namalyari, ay nag-alih ya ha Egipto, hēn a nalimo ha huluk nan ari. Ta nanad nay nan angkahêlêk hi Apo Namalyari ya a angkahêlêk.

28 Gawan êt ha paniwala na kan Apo Namalyari, ay hinonol nay in-utoh§ kanla ya mamatsi hilan tupa, ta ipunih lay daya ha kabat hēn bali la. Dinyag lay habayto, haka hēn nagdann bayro ya anghel hēn kamatsan, hēn patsêna ya punganay lan Egipcio, ay a natsi ya punganay lan Israelita.

29 Hila etaman ya Israelita, gawan ha paniwala la kan Apo Namalyari, ay nakabatah hila ha bonak hēn Dagat ya Naorit ya pinamala ta êmēn hila nakadann. Noa, hēn magbatah dayi hilay Egipcio, ya ampangorong kanla, ay nilêmeh hila gawan nag-orong ya lanêm.

§ **11:28** Bayron nag-umpisa ya Pistan Pangaligtas ha Egipto. Exodus 12:1-36.

30 Gawan êt ha paniwala la kan Apo Namalyari, ay nigêyma ya katag-ayan bakod ya dyag ha bato ya nakapalibot ha balayan Jerico* pangayari lan nilibot hên pitoy allo.

31 Hi Rahab† etaman, ya taga-Jerico, agyan miha yan hostis, ay a ya pinakilamo kanlan a naniwala kan Apo Namalyari ya pinatsi. Gawan ha paniwala na kan Apo Namalyari, ay hiyay nanawop kanlan nangimaton, ya in-utoh ni Josue ha Jerico.

32 Gawan ha paniwala la kan Apo Namalyari, ay kal-atan kapapaêpapah ya dinyag lan Gideon, Barak, Samson, Jefte, David, Samuel, haka hilay mámpamwang hên an-ipaihip kanla ni Apo Namalyari. Noa, kulang ya panaon hên ungkatén ya habayto ya tungkol ha nag-in biyay la.

33 Mal-at ya nadyag lan habayto gawan ha paniwala la. Ya kaatag kanla, ay nanambut ha kal-atan bansa. Ya kaatag ay namaala hên main katoynungan. Ya kaatag ay nakatanggap hên impangako kanla. Ya kaatag etaman ay nakapa-tsikum hên bêbêy leon.

34 Ya kaatag ay nakaparê hên apoy ya mamaalob. Ya kaatag êt ay naligtas ha tabtában. Ya kaatag ay pinakhaw, haka ya kaatag ay nag-in makhaw ha pamakilaban kabay angkaipaplag lay kal-atan hundaloh lan kaatag ya bansa.

35 Main hên babayi ya kinamatsan, ya biniyay oman ya habaytoy anlugarûn la.‡

Main kaatag ya natsi ha hadyay pamairap kanla, gawan a la impuglaoh ya paniwala la kan

* **11:30** Josue 6:1-21. † **11:31** Josue 2:11-22 haka 6:22-25.

‡ **11:35** 1 Hari 17:19-24 haka 2 Hari 4:18-37.

Apo Namalyari. A la impuglaoh ya paniwala la gawan labay la hēn madyanan biyay ya ayn angga ha langit.

³⁶ Main kaatag ya pinairapan hēn minusmus, haka dinapi. Kaatag pon ay inhukul hēn naga-gapoh hēn taykala.

³⁷ Main kaatag ya pinatsin pinagbabato. Ya kaatag ay nilagari hēn pinakay lawini. Ya kaatag êt ay pinatsi ha êtak. Hilay kaatag ay pinaalih ha balayan la. Dinanas la ya hadyay pamagkulang ha kaganawan kailangan. Nakatakop hila tanan katat hēn tupa haka kambing hēn nagdanas hēn hadyay pamairap.

³⁸ Nanad alwan hépat kanla hēn paidi hēn kalamo lan a nagpalokop kan Apo Namalyari. Kabay nikotaw-kotaw hila hēn napaidi ha kabalah-balahan, ha tinatawgtug, nilêyang-lêyang haka ha tinanil-tanil.

³⁹ Ingkahigla hila ni Apo Namalyari gawan ha paniwala la. Noa, a la pon nakwa ya impangako kanla ni Apo Namalyari, hēn angkabiyay hila ha luta,

⁴⁰ gawan tinalagá ni Apo Namalyari ya hikitamo etaman, ay makalamo ha impangako na, ya ayn kapantag ha kangérān, ta êmēn hila haka hikitamo ay pare-pareho hēn mag-in ganap.

12

Dapat palokop kan Apo Namalyari ya Tatang tamo

¹ No ialimbawa tamo ya pamanhumonol tamo kan Apo Namalyari ha hali-tagtágan, ay hilay habayto ya inungkat ya nananiéh ya paniwala

kan Apo Namalyari, ay nilatêng hilay na ha anggaan hên hali-tagtagan. Haka nanad naka-palibot hilan kal-atan hên ampamantay kantamo ha pamaki-hali-tagtagan tamo. Kabay kailangan tamon paghêhêan hên alihêñ ya pamanyag kasalanan, ta êmêñ ayn makahabkol ha pamtâtêh tamo ha pamaki-hali-tagtagan, ta êmêñ tamo maabutan ya anggaan.

² Dapat panay tamon ihipêñ hi Apo Jesus, ya ampangubatan hên paniwala tamo haka ya am-pamataniêh hên paniwala tamo hên angga ha ayn pamagkulang ya habayto. Impahlék na kantamo no ay-êmêñ ya pamagtêh na hên hiyay impako ha koros, hên a na ingkarêng-êy ya habayto ta an-êngganan nay mag-in kahiglaan na ha langit. Haka ampikno yay na ha dapit panabtab ni Apo Namalyari hên ampamaala hên kalamo na.

³ Dapat tamon ihipêñ ya pamagtêh ni Apo Jesus ha hadiyay pamanalanghang kana hên hilay mapanyag kasalanan, ta êmêñ a kitamo mahiraan nakêm, haka a kitamo humawa hên humonol kana.

⁴ Ha pakikwanan yon manambut ha kasalanan, ay a êt niabot ha ikamatsi yo, ya pamakilaban yo.

⁵ Kayno naliwaan yoy nay impahulat ni Apo Namalyari kamoyun maának na, ya dapat mag-in aral kamoyu, ya wana,

“Anak ko, paan mon daygêñ ngaw-ngaw ya pamarala na kamo hên Panginoon,
haka paan kan mahiraan nakêm no an-itoynong na ka.

⁶ Ta amparal-an ni Apo Namalyari ya hilay an-lugurêñ na,

haka an-itoynong nay an-itad nan maának na.”*

⁷ Dapat yon pagtêéhan ya kairapan ya lumatêng kamoyu, ta habaytoy pamarala kamoyu ni Apo Namalyari. Habaytoy ampamaptêg hên maának na kaw. Yarin main anak ya a amparal-an hên tatang na!

⁸ No a na kaw paral-an ni Apo Namalyari hên nanad ha kaganawan maának na, ay alwa kaw awud hên mantêg hên maának na.

⁹ Pinaral-an kitamo hên tatang tamo di ha luta, haka an-igalang tamo hila. Lalo dapat tamon pagpalokopan hi Apo Namalyari, ya nag-in Tatang tamo ha langit, gawan ha paniwala tamo kana. Ta ha êmbayro, ay magkamain kitamon biyay ya ayn angga!

¹⁰ U-ungnon bat ya taon, ay pinaral-an la kitamo hên toa tamo do ha an-ihipêñ lay usto. Noa, panay ha ikangêd tamo ya pamarala kantamo ni Apo Namalyari ta êmén kitamo mag-in banal, hên nanad kana.

¹¹ Nahakit man, haka kapalungkot ya hinon pamarala, ay pamakayarin habayto, ay mag-in mahonol kana ya pamimiyay lan nagpatoro bayro, haka magkamain hilan kapatêkbêkan nakêm.

Aral haka panaad

¹² Kabay no nanad napagal kaw ha pamaki-hali-tagtagan, ay pakataniêhêñ yoy nakêm yo.

¹³ Dapat mag-in alimbawa ya pamimiyay yo, ta êmén mapataniêh yoy paniwala lan ampag-alangan.

* **12:6** Kawikaan 3:11-12.

14 Pakikwanan yon mamiyay hēn main pamikahundo ha kapareho yo haka dayuán yoy pamanyag kasalanan. Ta hilay labay hēn manyag kasalanan, ay a makapakilamo ha Panginoon lano ha langit.

15 Mihahawop kaw ta êmén ayn miha man kamoyu ya manalibokot ha ayn kapantag ya ingalo ni Apo Namalyari. Paan kaw magtanêm hēn hakit nakêm ta êmén a mayawa ya kal-atan gawan habaytoy pangubatan hēn gulo.

16 Dapat ayn miha man kamoyu ya mag-in nanad kan Esau,[†] ya ayn limo kan Apo Namalyari, ya mapanyag karawakan kalabayan lawini, haka namihagili hēn karapatan hēn pagkakabaya na ha pêpêrad ya pamangan.

17 Muwang tamo ya hēn naghêhê ya ha pagkahagili hēn karapatan hēn pagkakabaya na, ay ahina indin kana ya in-utoh ni Apo Namalyari ya midin kanlan kabaya. Pakikwaan na man dayi ya habaytoy ingalo ya ubat kan Apo Namalyari hēn main kalamoy pamandoko haka luwa, ay ahina naidin kana ya habayto.

18 Kabay pakikwanan tamon ihundo ya paniwala tamo, gawan mangêd ya bayoy kahundoan ni Apo Namalyari kantamo kanan manan kahundoan na ha ninuno tamo. A tamina andanasan ya kapalimo ya nadanasan lan ninuno tamo bayro ha Tawtgug Sinai hēn nahêlêk lay apoy ya mamaalob, hadyay diglêm haka hadyay hêkaw angin.

19 Nakagilam hila êt hēn tonoy tambuyok haka ya kapapalimoy habi ni Apo Namalyari. Hēn

[†] **12:16** Genesis 25:27-34.

nagilam lay habi, ay nakiingalo hila ya itunggén dayi ya habayto.

20 A la matêêh hên manggilam habaytoy utoh ya indin kanla, “Agyan ayop man ya dumani ha tawgtug ya habayto, ay dapat batoêñ hên angga ha mapatsi.”[‡]

21 Gawan ha hadyay kapapalimo ya nahêlêk la, ay nalimwan ya etaman hi apo Moises, ya wana, “Ampamêgpêg ako ha hadyay limo ko!”[§]

22 Noa, hikitamo etaman ya ampaniwala amêhêñ, ay dinumani kitamina ha Tawgtug Sion,* ya mantêg balayan Jerusalem ha langit. Dinumani kitamina ha balayan ni Apo Namalyari ya angkabiay hên ayn angga bayro, ha ampaidyanan hên kal-atan anghel ya a makwan mabilang, ya ampagsimba kana hên main hadyay kahiglaan.

23 Inlamo kitamina ha pagtsiponan lan maának ni Apo Namalyari ya dyanan biyay ya ayn angga, ya nakahulat ha langit ya langan. Naabutan tam-inay arapan ni Apo Namalyari, ya ampanlingon ha balang miha. Inlamo kitamina kanlan kallatan ya mahonol kana ya nuna kantamo bayro ha langit, ya habaytoy intad ni Apo Namalyari hên ayn kasalanan.

24 Inlamo kitamina kan Apo Jesus, ya mámilatan ha bayoy kahundoan ni Apo Namalyari ha tawo, haka ya daya na, ay nanad inwihik kantamo. Mapakinabangnan tamoy habaytoy daya na, alwan daya ni Abel[†] ya ampakikwa bat hên pamanum-

[‡] **12:20** Exodus 19:12-13. [§] **12:21** Deuteronomio 9:19. ^{*} **12:22**
Hêlkên ha panlêkan labay habiêñ hên habi. [†] **12:24** Genesis 4:10.

bah.

²⁵ Kabay paan kitamon magma-matlakan ha anipagilam na kantamo ni Apo Namalyari. No a hila nailigtas ha parusa, hilay unan a nanggilam ha panaad ni Apo Namalyari ya impamwang ni apo Moises kanla di ha luta, ay yarin miligtas kitamo, no a kitamo manggilam ha panaad ni Apo Namalyari kantamo!

²⁶ Hêñ haton lagi bayro ha Tawgtug Sinai[‡] ay nayége ya luta hêñ naghabi hi Apo Namalyari, noa, amêhêñ, ay nangako ya, ya wana, “Minghan ko pon êt hêñ yêgyêgén ya luta, haka alwan bat luta ya iyêgêñ ko, noa, anggan kaganawan ya angkahêlêk ha langit.”

²⁷ Ha pangahabi nan, “Minghan pon êt,” ya labay habiên hêñ habayto, ay alihêñ nay mayêgyêg ya dinyag na, ta êmén magpaayn angga ya kaganawan ya a mayêgyêg ha ampaidyanan na ha langit.

²⁸ Kabay pahalamatan tamo hi Apo Namalyari ta kalamo kitamo ha pamanlokop na, ya ayn anggaan, haka ya a angkayêgê. Simbaêñ tamo ya hêñ main pamanggalang haka kaaypaan nakêm.

²⁹ Gawan hi Apo Namalyari, ya ansimbaêñ tamo, ay maialimbawa ha apoy ya ampakaulam no ampamarusa ya.

13

Ya pamanhumonol ya ampamahigla kan Apo Namalyari

¹ Dapat yon ihundo ya pamilulugud yo, gawan patêl kaw ha Panginoon.

[‡] **12:26** Hagai 2:6.

² Dapat mag-in mahigla ya pamahowên yo kan-lan ubat ha marayo, ya lumatêng bahêñ, ta ha êmbayro, ay main nanan nakapahowên hêñ anghel ni Apo Namalyari hêñ a la muwang.

³ Dapat yon ingalwan ya kapareho yo, ya atsi ha hukulan haka hilay ampairapan gawan ha paniwala la kan Apo Jesu-Cristo. Pakidamayan yo hila hêñ nanad sarili yon lawini ya ampairapan.

⁴ Hilay nipag-ahawa, ay dapat lan galangêñ ya pamag-ahawa la. Haka kailangan pareho hilan mag-in tapat ha miha ta miha. Ta parusaan ni Apo Namalyari hilay ampanakêh ha alwa lan ahawa.

⁵ Paan kaw mag-in kamata hêñ pera. Dapat mahigla kaw hino man ya kapanapolan yo. Ta wani Apo Namalyari ya, “A kataw lakwanan o paulayan man.”*

⁶ Kabay makhaw ya nakêm tamon maghabin êmêñ di,

“Hi Panginoon ya ampanawop kangko,
kabay a ko angkalimo.

Ayn makaantsi kangko!”†

⁷ Dapat yon ihipêñ ya hilay unan namaala kamoyu, ya nanoro kamoyu hêñ habi ni Apo Namalyari, no ay-êmêñ nahêlêk ya kangêran ha pamimiyay la, haka no ay-êmêñ hila natsi. Haka dapat yon tuwarêñ ya paniwala la.

⁸ Hi Apo Jesu-Cristo etaman, ya ampaniwal-an la, ay a ampangoman. No ay-êmêñ ya hêñ hato, ay êmêñ ya êt bayro amêhêñ haka hêñ angga-angga.

⁹ Paan kaw pagtan ha hinoman ya toro ya kalok-wan. Mangêñ no ya paniwala yo ay antumaniêh

* **13:5** Deuteronomio 31:6. † **13:6** Awit 118:6.

gawan ha ayn kapantag ya ingalo ni Apo Namalyari, kanan pamanhumonol ha patakaran ya tungkol ha bawal hēn kaēn. Ya pamanhumonol kanlan habaytoy patakaran ay a ampakataniēh hēn paniwala.

10 Hilay ampamihundo hēn pamiátang lan ayop ha pagsimbaan hēn pamanhumonol ha Kautuhan ni apo Moises, ay a makapakilamo kantamo, ya makiarap kan Apo Namalyari gawan kan Apo Jesus ya namiátang hēn sarili na.

11 Habaytoy daya lan ayop ya an-iátang taon-taon para ha kasalanan, ay gintan nan pinakapoon pari ha Pinakabanal ya Kuwarto. Noa, ya lawini lan ayop ya in-átang, ay in-ulam ha marayo-dayo ha paidyanan la.

12 Émbayro etaman hi Apo Jesu-Cristo, ay gintan ha marayo-dayo ha balayan hēn impako ha koros, hēn hiyay natsi, ta êmén malinisan kitamo ha kasalanan tamo hēn daya na.

13 Kabay lakwēn tamo hi Apo Jesus ha marayo-dayo ha balayan, ya labay habiēn, magpapawa kitamo kanlan êndat la ya mag-in hilan mangēd ha hēlēk ni Apo Namalyari ha pamanhumonol ha Kautuhan, haka makilamo kitamo kan Apo Jesus. Magtēêh kitamo ha pamandaêh hēn nanad ha tinéêh na.

14 Gawan alwan bayri ha luta ya paidyanan tamo hēn ayn angga, noa, main kitamon an-êngganan, ya balayan ha langit ya ayn angga.

15 Kabay panay kitamon magpuri haka mag-pahalamat kan Apo Namalyari gawan kan Apo Jesus, ta habaytoy átang lan ampaniwala kana.

16 Paan tamon liwaan hēn manyag kangēran haka manawop ha kaatag, ta habayto êt ya átang ya ampamahigla kan Apo Namalyari.

17 Palokop kaw kanlan ampamaala kamoyun ampaniwala, ta hilay ampakapataniêh hēn paniwala yo, haka pakibatan la kan Apo Namalyari no a la daygēn ya habayto. No honolēn yo hila, ay mahigla lan tuparēn ya tungkulau la. Noa, no a yo hila honolēn, ay tumabang hila, haka habaytoy alwan ha ikakangêd yo.

18 Ihalangin yo kay. Angkasigurado naêñ ya malinis ya konsinsya naêñ, ta ampakapakikwanan naêñ, ya makapamiyay kay hēn main kangēran hēn allo-allo.

19 Ampakidoko ko kamoyu ya ihalangin yo ko ya tampol akon makaorong bahêñ kamoyu.

Inhalangin hilay hinulatan

20-21 An-ihalangin kataw ya hi Apo Namalyari ya ampangubatan hēn kapatékbêkan ay mam-i kamoyu hēn kaganawan kailangan yo, ta êmêñ ha hawop ni Panginoon Jesu-Cristo, ay mahonol yoy kalabayan na, ya makapahigla kana. Hiyay namabiyay oman kan Panginoon tamon Jesus, ya pastol ya ayn kapantag, ya natsi hēn nam-in daya na, ya namaptég ha bayoy kahundoan ya ayn angga. Puriêñ tamo hi Panginoon Jesu-Cristo hēn ayn angga! Amen.

Tawlin habi

22 Patêl ha Panginoon, paan kaw dayi hēn humawa ha an-iaral ko kamoyu di, ta alwa etaman makarang ya hata hulat.

23 Labay ko êt hêñ ipamwang kamoyu, ya hi Timoteo, ya patêl tamo ha Panginoon, ay in-awah ha hukulan. No tampol yan makalatêng bayri, ay pagkalamo ko ya ha paniraw ko bahêñ.

24 Ikumusta yo kay awud kanlan ampamaala kamoyu, haka kanlan kaganawan ya pinili ni Apo Namalyari hêñ mag-in kana ya atsi bahêñ. Angkumustaêñ kaw etaman lan patêl ha Panginoon ya taga-bansan Italia.

25 Ingawan na kaw dayi ni Apo Namalyari.

Ya habi ni apo namalyari: Bayon tsipan - Ayta Mag-antsi New Testament in Ayta, Mag-antsi

copyright © 2006 Wycliffe Bible Translators, Inc.

Language: Mag-antsi Ayta (Ayta, Mag-antsi)

Translation by: Wycliffe Bible Translators

Contributor: Wycliffe Bible Translators, Inc.

Copyright Information

© 2006, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789718260654

The New Testament

in Ayta, Mag-antsi

© 2006, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

PDF generated using Haiola and XeLaTeX on 18 Apr 2025 from source files
dated 29 Jan 2022

d2289d90-e8af-5f04-a1e1-312fd0921aff